


黔
縣
志

續志附

72.6523
67/2.0731
=6



黟縣志卷七

人物志



尚義

唐

孫師睦字汝厚龍紀大順閒避孫儒亂自廣陵遷居黟善治生以致富歲饑賤出穀以升斗付糴者鄉里稱之

宋

汪維佐黃陂中村人為人剛直有守不妄言笑族黨嚴憚之汪氏之為黃陂人自九世別為三族在中村者百家疎戚墳墓為之完葺祭享不失時村前有泉百家汲澣於是



維佐病其不潔不可供祭祀乃規度判爲二池鑿廣贅石
上汲下澣人皆便之縣城北有雙溪合流湍悍病涉出泉
二十萬爲橋五丈有奇覆之以屋姪進士舜昭題曰利涉
橋橋少西有溪雨暴集則壞阡陌瀕溪之田歲比不收乃
相高下規偃瀦用工萬計正曲爲直積潦不復爲田害鄉
里貧者凶年仰哺於維佐審倉口而貸以粟細民服其役
者將五十戶死畀之棺與地葬之而存恤其孤事詳知祁
門縣事葛長卿墓志銘見藝文志

程士龍橫岡人好義喜施與嘗建橫岡忠烈諸廟宇有先
儒胡淡菴銓記臧否人物有藻鑑之明一女適歙方虛谷
回後登進士第元至正四年後裔儀鳳兄弟捐資重修忠
烈廟先儒汪環谷克寬爲記見藝文志

元

黃真元一名友仁四都黃村人父月潭隱士以高標伏鄉
里真元幼講學力行念祖宗先澤不忍沒效范公法買田
六百三十餘畝立莊建祠祀其先人自始祖而下冢木菴
鬱祭膳羶薌族眾百餘口日會歲帛婚嫁喪祭給支有等
延致碩師訓其子弟規式凡具有條理至正十一年奉
旨就將前項銘刻於石事詳禮部尙書汪澤民黃氏厚本
莊記見藝文志

明

汪葵已見孝友傳

丁佛佑洪武時處士天性孝友出租百餘畝買燈油爲子孫讀書之用凡屬姻黨濟困扶危值凶荒捨棺施粥舉鄉飲大賓厥後四子十八孫目睹曾孫四十二人

汪宗享巖下人佃儻有大志明初賊盜竊發上官委以團練之長宗享捐貲助餉竭力捍禦地方安堵

余富宗梓川人明處士質樸樂善建梓桐石橋竝築茶庵又於通甯池路建石橋三處宣德間事也

汪文保一名志道黃陂汪淮子嘗拾金二百兩於路蓋祁

門謝姓納糧於郡所遺也時文保亦詣郡訪其人得實還之謝分金以酬不受事聞太守守召使受金文保固辭守謂謝日報德途寬何必以金相強謝俛思曰小民有二女年若干矣願結姻於汪氏守曰善問文保汝子年幾何曰子八人皆娶矣有孫乎曰三十大者娶矣小者年不相若守立舉手曰有是德宜有是福又問親屬有相當者乎曰有弟某者可守喜令訂婚姻取果酒鼓吹送之出乾隆二十八年奉

旨崇祀忠義孝弟祠

江彥良字德輝蓬廈人家貧躬耕適有所往拾遺金三百

於路亭攜至家返亭中守待久之有倉皇至覓所遺者言
十載還鄉盡喪所有時將暮因引至家舉橐還之客分金
以酬却不受遂止宿焉明日客泣謝而別鄉人因目其亭

曰還金亭

孫志云彥良明宣德間人前志失載
國朝康熙中郡司馬張公下車課士曾以汪文

保事命題彥良曾孫有聲遂上書白其事乾隆癸酉涇縣
侍御趙青藜主講紫陽書院有書江氏還金事文因採以

補入見
藝文志

程文質桂林人勵廉隅嚴取與望重一時宣德六年教諭

羅宏訓導毛檄重修儒學文質贊勸率好義之士汪士濂
等各助金穀鳩工購材煥然一新功成勒其名於碑陰事
具郡守崔彥俊記中子廷璉性直方好善體父兄志人有

急多方以濟之

汪志善黃陂人亦灌子居鄉仗義正統三年戊午邑大饑
輸穀千石以賑又嘗建雙溪橋

胡彥本字勝宗郭隅人正統九年出穀一千二十餘石以
助賑濟朝廷嘉之特賜敕獎勞以羊酒旌為義民仍免本
戶雜泛差役三年子洪字志廣景泰六年助穀六百石賑
濟鄉人俱建尚義坊於旌義堂前

金孟榮城北人父文瓚務德好施孟榮繼志每值歲荒出
貲遠糴減價以濟時艱妻汪氏見窮者棄嬰輒為收養還
之至數十人至今稱頌不已

朱思信朱村人建縣路亭東文嶺亭以憩行人族有讀書者置燈油田以給之姪通尤賴資助之力

汪廷珍霞阜人與弟廷京廷光俱好義建越國公祠修元儒倪仲宏先生墓景泰間輸家財以足邊餉詔旆尙義之門建坊兄弟俱錫冠帶又橫岡吳仲遠者成化閒輸粟助賑勅賜建旌表尙義之門

舒志道屏山人孝事父母友于兄弟貧窘者每捐財資助遇暴露輒給棺葬之成化初興修公署知縣邱諒擇耆宿四人以司出納志道其首也工竣志道同余允恭汪叔淮輩請太常卿程敏政爲文以記之又嘗修理府學興建書院邑中橋梁多所興造屢舉鄉飲大賓年登八旬知縣董復壽之以詩至九旬而沒前知縣胡拱辰已爲戶部尙書聞計遣人致祭焉乾隆二十四年奉

旨崇祀忠義孝弟祠

余允恭字完養城西隅人孝事孀母汪氏友愛弱弟允迪凡有公署興修皆踴躍經理完善晚年與弟遵朱子家禮建立家規以訓子孫俗多化之今家規鏤板尙藏家廟葉芹南屏人嵐縣令圭第三子也性好施與尙義有爲捐貲助公恩旌義官順親敬長一鄉典型

孫昌古築人樂善好施見重於士大夫邑中有大興作皆

舉以督率宏治初歲饑輸穀一千餘石以助賑旌表尙義之門建坊里閭錫以冠帶

王員生百戶人好義慨慷邑中增築月城輸力爲眾民先

城功未畢遂以勞殞子張祿有孝行終父喪自經墓側胡文郁西遞人事親孝以庠生援例授大同宣府衛經歷歸遇歲饑悉捐貲以賑困乏

王錚號筆峰城東隅人啟行不怠見重於士大夫有隱德通債者焚其券著有聚好錄筆峰稿嘗建荷恩堂守中軒

仰高樓於所居之東南與兄欽姪大儒各捐已田以供祭祀族人賢之

羅顯貴五都人重質好義歲歉救飢嘉靖間授以冠帶

程維銑桂林人捐貲助建黌宮同兄維錄復祖基建桂林

柏林二支祠以奉先祀又建文孝橋子端紳耿直不阿正

德閒邑清丈田畝舉作公正豪強所侵佔者悉令歸弱戶

義聲載道享年最高郡守兩舉賓筵孫有育嘉靖選貢官

至德州同知有廉聲

朱廷理字變臣朱村人始建長豐社廟嘗以乏嗣置妾甫

入門見其悲慘問知其有夫而迫於困阨也卽送歸竝以

衣匱資之其夫婦泣祝朱公長生多男而廷理側室余氏

果舉一子

胡岩卿郭隅義門胡彥本裔弟華卿俊卿九卿俱國子生

撥送諸司厯事入吏部選籍不仕家居一庭雍穆好義樂施無私財凡邑中建造祠宇橋梁皆慷慨捐貲或獨任或勦成及施藥掩骼善事甚夥有莊田在祁門祁庫吏胡裕卿者虧帑金二千餘妻子皆繫獄裕卿覲脫罪妄指與岩卿兄弟有連官檄問岩卿兄弟不置辨卽鬻莊田數百畝代償之而裕卿妻子獲全時論以爲難能云

胡天寵橫岡人教諭胡縉之孫父敏士好施天寵繼志嘗出穀百石輸公備賑又嘗捐百金率眾創建宗祠賑窮濟急邑中建學及造橫岡橋縣宰皆舉天寵督造

王天爵城東蔡村人尙義好施隆慶元年奉文議築城天爵捐備磚石築朝陽門官給扁額免徭役

王元隆城東人篤於孝友慷慨好義捐貲助造石門山路隆慶閒襄築東城得免差役

程宗元字泰初桂林人恤貧乏掩暴露督造紫陽橋其功尤著

朱廷璉字國器朱村人事父母孝待兄弟友倡眾以修祖塋築祠以崇宗祀建橋救荒一鄉感德薦舉賓筵恩錫冠帶同族有朱萬碩建巖溪大石橋捐粟賑饑朱萬化捐貲修路建橋朱應宿造縣路坑亭以憩行人朱應極重修至縣大路及大石橋皆慷慨好施者也

汪繼源城中人慷慨好義知縣謝廷傑舉督造書院扁旌樂義知縣吳應乾舉督造城垣扁旌高義知縣王家光舉督修覺宮扁旌褒義郡舉賓筵給冠帶

余應岳城西隅人祁州刺史徽曾孫也性敦孝友義篤鄉閭樂善好施老而不倦御史旌其門

朱濟略字蔚文朱村人孝善父母敬事二兄勸人爲善憫卹鄉鄰同兄濟絨濟韜捐上黃地十餘畝爲義冢子善性能繼志施茶助藥濟人利物之事樂爲不倦

孫伯清字一水古築人嘗助親族之不能婚娶者兼有才幹排難解紛鄉閭引以爲重置祀田以供春秋祭享刻萃渙集以明敬宗收族之義又常置燈油田啟蒙田以贍卹後人天啟崇禎閒兩舉鄉飲年登九旬五子俱稱克家程切郭隅人嘗出穀七百石以助賑饑撫按上其事賜以冠帶

胡耀字顯文六都人開東文嶺大路建株林下路亭賑貧濟饑九與賓筵子孫熾盛

楊正芳八都人少孤家貧力耕以養祖父母及其母始終不懈嘗致千金分給幼弟明末歲潦凶爲饘粥以賑存活甚衆弟正茂亦好義捐資以造石橋

國朝

黑馬志 卷一
胡吳字健甫西遞人賑饑施藥活人甚多順治乙酉宋乞胡得等倡亂籲兵平剿乾隆三年奉

旨建坊崇祀忠義孝弟祠子人瑞克承父志康熙十年旱首倡賑饑由貢生考授州同知

舒文肅字堯思屏山人國學生順治乙酉逆僕倡亂捐貲千金請

大兵進剿邑賴以安乾隆五年詳請

旌表崇祀忠義孝弟祠弟文穆周急濟貧爲時所稱

余昌來字翼及城西隅人邑庠生慷慨尚氣節順治乙酉宋乞之亂昌來上書軍門請剿同時以禦亂著者又有舒

士科江德衍韓定邑庠生汪伯升程羽儀汪日暉

黃志廉字永清黃村人負奇氣明末嘗挾策謁閣部史公可法不用念親老而歸爲保禦鄉土計

國初邑有逆僕之變志廉挺身詣提督張天祿請兵剿滅邑賴以甯嘗倡修集成書院以教族中子弟以子元治貴贈戶部員外郎晉贈中憲大夫

程世俊字君籲桂林人建族祠大門助造石山挹秀橋崇禎丙子饑捐金以賑 國朝順治戊子又饑市米平糶

余正長字仲仁城西隅人父順孫好義嘗賑族黨饑正長建長生亭於麻田里仁坊以施茶湯又砌造環碧門外大

路

汪瓊字南珍官路下人順治十年獨力建造石山挹秀橋止自認出費二千兩而歸其善於當事又割腴田數十畝屬後人以歲積所入爲修葺費迄今獨修已五次矣事詳知縣竇士範林遷碑記俱見藝文志

吳鍾奇橫岡人母胡氏故節婦鍾奇經商家小裕以貲之半歸之兄而已與弟分其半處族黨散睦順治十三年建四十八級上茶亭曰雙桂亭

汪耀廷字君彥幼失怙事母孝弟耀聖早喪撫其三孤親族貧乏者不惜傾貲以濟之順治十六年賊犯祁門被掠婦女數十人拘置高樓耀廷出數百金贖之各歸其家至建茶亭造橋梁施棺焚券不可勝計

程世中字邦時桂林人順治辛丑年荒傾囊販米平糶又嘗焚友人借券鄉里稱之康熙甲寅邑有寇災約鄰里併力捍禦平時借券悉焚之境賴以安舉鄉飲賓子文祥有孝行孫一枝葬親不泥術家不利長子之說語諸弟以急安先人體魄爲重毅然葬之

汪良謨字希文生平慷慨好義以濟人利物爲念孝友孚於鄉閭親朋匱乏罔不周給至於修橋路施棺衾不一而足子士琇康熙丁巳浙江舉人

黃文東字啟明石山人家貧業子平術有嶺名四十八級者歆險峻絕行人苦之文東捐貲以坦其塗功將成而沒子大菀繼之修葺完工事詳教諭尤何碑記見藝文志舒家慶字善餘屏山人嘗造邑南大路助修城東大石橋又造坑口石橋襄成東嶽廟歲饑施粥修理學宮遠近咸稱頌焉

王文光郭隅人康熙辛亥歲饑倡義捐米以賑屢舉賓筵辭不赴同時以樂善好施著者楠木嶺人歐陽一枝七都人史國華城中人湯大銘朱村人朱之彥橫岡人胡尚智梅源庠生歐陽琦柏山人王佐古築人孫用中

王志名城枝節

西人余順孫六都人程一舉瑪川人汪榮霞塘川人楊聖

功員川人胡世華桂林人程世彥其前志不載里居者又

有貢生汪潤邑庠生汪鯨化及汪時英王應莊舒明光程

世欽汪耀輝周有佐張日華汪天美汪宗璜湯元昌

楊廷選八都人父天德服賈孝養廷選以孝繼數十年猶

一日弟早世乏嗣撫姪女如已出居瀨大河洪水病涉捐

貲建永濟橋行人賴之

歐陽雲鵬字翼如楠木嶺人性孝友嘗剖冰求魚以痊父

病遇荒歲出穀賑族鄰撫孤恤寡為人排難解紛以息爭

訟郡縣屢給額獎之

舒吾賢字任先屏山人輕財好施嘗造二都龍蟠橋襄成陳閩橋又無名橋亭勦助成功不可枚舉

楊春元八都人服賈以奉父母撫諸弟無私蓄徧厯吳越閩楚關陝間所至輒有聲嘗在粵東有貸尙藩貲莫償者挈其子同赴水死春元亟呼救之代償所負且厚給其家無靳色

胡宗府字邦尹五都人焚券濟貧庚辰辛巳連歲大荒傾廩以賑年逾七旬足跡不履公庭

朱兆公一名家祐字以篤朱村人力田養親事兄撫姪盡友愛之道倡修文公祠字康熙乙亥賑其戚卹暮年悉焚貸券

楊龍見字思皇八都人生員嘗之江右阻風鄱陽湖適岸上有遭回祿斃死者龍見傾貲贈之鄰吳姓久客無耗婦欲改適僞作其夫書封白金寄之婦遂安於室而其夫亦歸康熙二十四年捐田租二十租入九蓮山爲邑厲壇埋葬費及居親喪以守墓患足瘋居於家

舒國佐字明卿幼失母哀慕如成人嘗贊成其父讓千金繼產於從弟事繼母以孝聞居喪哀毀骨立性喜施予修橋梁道路捐重貲無吝色親屬貧者待以舉火死無所歸則殯之力行善事老年不倦舉鄉飲賓

周世達字通甫七都周村人少貧篤孝藜藿自給而奉親
旨甘二十年無缺家稍裕輕財好施遇凶歲捐貲賑饑道
殮買棺瘞壘族內無後棺骸暴露者悉收葬焉

朱元禮字敬斯朱村人貢生性好義置義冢修平道橋爲
人排解族中賴以無訟者數十年子振燎字光遠監生行
如元禮稱好義肖子云

范顯廷字德修柏山人居家孝悌喜賙人危急臨終命子
焚借券還邇誦德

盧福星字光遠盧村人少孤事祖父母以孝聞康熙六十
一年雍正四年再賑族黨饑赴江西買米平糶嘗築羊棧
嶺北半嶺亭施茶湯又修嶺路

舒嘉瑚字惟夏屏山人監生性孝友商於江西往來彭澤
建大埠渡與橋有義渡錄刊行

朱永鑫字濟可朱村人幼失怙事母以孝聞嘗置義冢修
平道路

余琦字公輔城西隅人能周族卹歲杪餽以金子廩監生
學祖字希敏性孝友爲人伉直族中推重之邑公事眾畏
避者學祖居其中竟自保兼護多人遊襄漢遇客舟中憫
其窮途傾囊以贈入巡撫楊公幕楊重其人將以漢口饑
務予之不果而卒孫貢生廷立亦好義嘗置義冢於迎靄

門外

楊昇字扶曙八都人邑廩生家貧授徒休甯有查氏子名廷瑾者質穎悟家貧缺脩脯請辭去昇揣知之以館穀歲入所積計百金予之俾資膏火廷瑾由是卒業有文行人稱南浦先生編修汪士鏗爲之志墓

程太祥字以平桂林人性孝友生平多質行儉約自持橋梁祠宇多捐貲贊助以迎霽門外通郡大路多傾圯自鎮安亭至鳳凰橋相度修平需四千金估計成適病卒遺言成之

汪元佑字承謨黃陂汪輔孫心存利濟邑有興修義舉無不倡始樂成值歲旱與族人汪邦棟等買米貯宗祠平糶族不知飢又嘗捐社壇地爲義冢復捐汪家坑地倡設懷仁局以善其後知縣孫維龍爲文紀其事

倪君肇字鼎元七都里安人性清謹足跡不履公庭遇親友急難多方周卹橋梁道路亦樂襄成康熙辛亥歲饑出粟以濟鄉鄰

胡元照字臨四西遞人遭親喪哀泣如孺子三年廬居喪次先是聞父病自吳門疾歸夜行遇虎不復顧虎亦尋去人以爲孝行所感歲饑出粟賑濟全活甚眾

程天瑛四都古築人捐職中書族中孤寡生相周卹死爲

殮葬邑西陳閭舊有石橋溪水衝蕩行人病涉乃請於縣
倡義重建身任其勞郡守何公達善勒其名於善人碑

舒嘉儀九都人捐修羊棧嶺官路建亭東文嶺并修本里
廟宇

舒德兆字謙吉九都人考授州同知性孝友好施予歲祲
賑濟族鄰捐貲助修祁邑大路又承祖志道重建東門橋
不下千金知縣黃家甲作記名橋曰永吉舉鄉飲大賓

胡士苑字萃文西遞人乾隆初族人_{有爭門巷隙地涉訟}
十數年者士苑以己地爲調息而其人弗知也士苑故有
聲庠序子時泮字魯宮亦名秀才也有父風好爲人排解
薰其德者忿戾之氣自消乾隆十六年移學宮時泮議六
都任明倫堂工程及修城任勸輸其事俱載於宗族尤雍
睦年九十餘

胡正有橫岡人縣丞銜乾隆九年衢州華埠水災漂沒民
居人多失所正有經商其地力爲賑助桐城劉大櫨爲作
華埠救災贊正有居鄉橋梁道路諸善舉亦多贊成

汪晃字昇初例貢生重建規溪周孝子廟春秋祭祀乾隆
癸亥辛未歲饑出貲賑濟修橋治路多不勝載

余延椿艾坑人其祖遷居蘇州延椿就職州同乾隆十四
年以金一千八百寄艾坑憑族置義田一千二十六畝爲

宗祠祭祀族童延師及贍給孤孀費

胡近垣字于薇橫岡人附貢生乾隆十六年移學宮督營

明倫堂又嘗倡修宗祠生平足跡不至公庭鄉評重之

舒大信屏山人州同銜性好善其從叔貧恆供億竝為其

子昏娶戚邨求索及殯葬亦力任之經商江右置義冢四

處乾隆十六年歲歉在籍買米平糶修村口至城路修東

山道院旁置屋十餘楹為族人讀書地邑人議建書院大

信存二千四百金助之其生平所修造五雲菴東嶽廟第

三殿廣安寺正覺堂及他橋亭道路又於江右施棺木設

渡船掩齒助賑類多義舉云

胡丙培字篤侯西遞人以千金修石山至西遞路五百金

助建鳳凰橋又移建學宮歲饑捐賑多勲義舉乾隆二十

八年捐建城工三十二年奉

旨賞給八品頂帶

汪燮字容若宏村人附貢生以浙鹺議敘主簿父高有孝

行燮善事親待族人厚嘗以歲祲三賑其族修北莊嶺及

潭口路竝建路亭又捐縣城工修魚亭通濟橋羊棧嶺茶

亭施茶湯方藥施棺埋齒刊行蒼生司命經驗良方金剛

經集註增刪堅瓠集行世以子思昱思蔚官

封奉直大夫晉贈奉政大夫
嘉慶十一年邑人呈學詳義
行藩憲準咨核入江南通志

王應超字升侯百戶人事兄應灝敦友讓平生好義舉年九十餘不急村前築石橋曰采虹子廷柱孫嘉猷等三賑族鄰饑置義冢助喪葬修路建亭皆有善行

余國揚字廷白城西隅人貢生生平好善庭闈雍睦嘗於邑厲壇旁捐豆租陸租地爲義冢扶助人葬

程學祖字繩武貢生程學禧字鴻如州同銜桂林人學祖幼失恃事繼母以孝聞乾隆二十八年捐修城工議敘八

品頂帶嘗置義冢於城北建東嶽廟土地祠學禧於乾隆丁未歲賑族人饑捐貲鑿開潯陽溪路初赴郡者由長演

嶺至是行人便之嘉慶三年掩埋李村馬川下坦靄岡暴

露一百五十四棺又施棺七十五具先是其父喪時學禧方七歲學祖撫成之無私財學祖歿長子桂蘭先亡次子亦七歲學禧撫成之亦無私財族人咸稱之桂蘭見宦業傳

蘇源字于泉赤嶺人貢生族有子死而母令婦改嫁者婦以遺腹不可源義之資以生養其親弗汪某外賈無耗婦將改適人源爲作家書并白金寄其家婦意始定越三年而後汪歸源經商都昌有中表假田券質銀而耗於賭相扭投河源爲贖之嘗往來浮梁樂平於南村嶺上建涼亭施茶於三星菴行人便之又於邑之西武嶺建如心亭修

亭至花橋路三十里於陶嶺舊路修石橋計十八洞源好善不倦施棺數百具掩葬邑厲壇露骸年老居赤嶺三十載村少爭訟鄉人俱推服之

程炎字二輝柏林人生員幼岐疑通毛詩乾隆二十八年捐修城工議敘八品頂帶為人意度豁如有長者風每歲杪負錢米周族人貧乏者終其身不替且儲財以善後歲杪饋貧年饑賑餓皆取給焉嘗修柏林至舊菴路

汪日章字首禾宏村人性最聰敏自幼有文名浙江仁和商籍乾隆乙酉舉人由內閣中書游陟卿階敦鄉誼久居京城以駮無會館值邑人應試北闈者眾日章述其父志與眾籌之置會館於宣武內外南半截衚衕時乾隆甲寅也親為經理者八年莅外臺始以付之邑人宦京師者日章官安徽布政使以祖籍請迴避得

旨不必迴避俄改蘇州布政使官至江蘇巡撫按汪公官業茲不載

以自有官書也今惟取其涉駮者江飛鵬字濟川江村人乾隆三十三年歲祲捐貲賑濟嘗修北莊嶺頭至龍蟠橋路飛鵬州同銜子貢生元鏜布政司經歷銜元鎮於丙午丁未壬戌丙寅歲四賑族黨饑

余廷俊字立卿城西隅人貢生慷慨好施凡城垣廟宇橋梁道路悉為經理踴躍助修族隣之積欠無措者代為完

償郊野之暴露無收者代爲埋瘞生平尤篤於孝友內外無閒言乾隆庚寅歲郡縣舉鄉飲大賓

方昂字叔駒厚善人山東歷城籍乾隆辛卯進士以刑部郎中授江西饒州知府請假至鰥省祖墓值邑人於黨峰立文峰塔合形家言輸俸助之見四都文會以爲立法善亦赴之居市月去與族人泣別曰他日得歸田願返故土以樂餘年平生之願足矣勉族人讀書力田和睦親族州黨鄭重而去昂爲人靜默廉介不可干以私所至有聲官至蘇州布政使護理江蘇巡撫

案方公宦業應詳歷城志今載其涉鰥者

程學本字力培桂林人布政司理問銜少孤事母孝乾隆

戊戌丁未嘉慶癸亥己巳四賑族儻遇人有急隱濟之雖家人弗使知也又捐貲修治秀里至北莊亭大路四百二十餘丈拓泮池理學案山建魁星樓聖母祠皆襄其成葉長春字坦如南屏人性儉樸及舉義事不惜費嘗修百尺段至胡村廟大路千餘丈二子長正華次華年能繼志修西干及萬松亭之西石路二百餘丈又造萬松亭及下洪柏僊西園澤上等處石橋凡有義舉隨時行之經久不怠

汪世燿字景文汪世煒字丹文黃陂人兄弟友愛邦棟子

也邦棟見表黃陂地勢東向虧陷燿煒成父志乾隆四十七年

倡捐銀三千四百餘金糾族人造文峯卽其下作雲門書屋爲汪氏文會所胡果泉部郎克家爲之記見藝文志又捐千餘金輸入宗祠置宅於江甯館族之秋試者他如捐義冢脩深田路及溇陽路三百數十丈皆義舉也

邵元平字文如規溪人幼貧采薪苦路險多虎後稍積聚自章嶺下至橫潭造石路三十餘里中建休憩亭二乾隆乙巳歲嘗賑族鄰元平於路工成後三日勉其子六人多爲善事端坐而逝年七十八

孫洪維字期張古築人五世祖濟聘爲明通儒洪維事父母以孝聞兄洪紹專讀書弟洪紀久客於外洪維獨任家政父母歿服除出尋第十餘年踪跡幾徧天下撫姪如子建濟聘公祠於村之東山麓洪維性勤慎能忍嗜欲於義當爲者卽力任之族黨告乏未嘗虛所請使有缺望者乾隆丙午丁未歲歉賑其族及其鄉鄰急乏者計糴米白金萬二千餘金邑之西武嶺爲往來孔道贅石關險躬自省督閱五年工始竣造石孔亭施茶濟行人又修陳閭石橋邑人俱稱之前知縣殷君濬哲議建書院洪維首先輸貲旣而中輟嘉慶四年臨卒遺屬存銀二千兩爲書院費洎十三年建書院卒如其志云

嘉慶十二年閩邑紳士呈請本學詳報義行藩憲準咨核

入江南通志

吳世瑛橫岡人監生幼孤事母克盡其道母胡氏節婦也
世瑛於建宗祠能盡力乾隆丙午饑嘗貸貧乏修理橫岡
橋路

汪廷熾字旭亭黃陂人邑附生性恬重爲文古淡不競時
好生平勇於行義乾隆乙巳雙溪橋圯行人阻嘆廷熾時
抱痠疾偃臥牀簣慨然捐白金千三百餘兩重建石橋行
人便之熾家僅中產橋成家資已傾大半矣

江名宗字岱山江村人貢生嘗再修江村北大路乾隆丙
午嘉慶壬戌歲祲再賑族黨饑

胡學梓字貫三六都西遞人性孝友父客江右思念不忘
數跋涉省視母哭少子喪明醫弗效朝夕舐之復明執親
喪哀毀骨立好善樂施邑議建書院首捐白金五千兩遇
歲歉賑族黨前後計米六千餘石造齊雲山下登封橋霽
岡橋襄造魚亭永濟橋修造本邑及歙休祁邑大路九處
前後費白金逾八萬兩他如置義渡義冢捨棺助瘞散藥
施茶諸事閱數十年爲之不倦

嘉慶十二年邑紳公請本
學具詳藩憲準咨核入江

南通
志

程必達桂林人性端樸同祖兄弟四人友愛至老彌篤乾
隆戊申歲歉賑族鄰凡邑中善舉必與之尤喜獎後進或
資以膏火族鄰嫻喪有貧乏者輒周恤之人稱隱德

程學植字蘭谷桂林人州同銜幼失恃能事繼母兄弟雍睦性坦易好爲善乾隆壬子子雲翰應順天試學植在籍任勸捐置會館今館在京城順城門外南半截衚衕學植多善行詳藝文志墓誌中

孫啟祥字廷瑞古築人貢生少孤事母孝其長兄不慧仲兄外賈啟祥奉其兄豐而自處儉約仲耗其財無少怨妻沒子女婚嫁聽命於嫂家無闕言啟祥賈於皖有族人挾貲寓僧舍病篤託後事於啟祥啟祥經理之悉歸其餘有查姓者以數千金託啟祥居積且恐爲家人耗屬勿使知啟祥予之簿使筆之旣而查猝死其家人果不知啟祥俟其喪事畢呼其家人至計本若息出舊帳楚付之時傳爲僅見事啟祥醇謹自守見信於人創建家廟經理祠會悉有條理族黨咸仰嘉行焉啟祥生平多善舉鄉有不平經其排解訟端爲息

舒銘勝字建侯屏山人樂善爲鄉里所推補路修橋施茶湯送路燈瘞埋馬家塢鐘鼓塘棺骸生平多義行其屋幾延燒有反風滅火之異云

江良弼字輔堂江村人幼孤善事母性好義買紙錢培地爲義冢於大路修建來儀亭施茶置常租一百二十碓店租屋一所爲茶湯費

盧士蛟字起潛盧村人通判銜質直好義嘗賙本支饑施人棺木建羊棧嶺南半嶺茶亭修石門嶺路竝亭

葉榮楠字松瞻南屏人性寬和善與人解紛好施與嘗襄造石橋及修村東石路二百餘丈不惜費

葉兆魁字文高南屏人家不中貲歲饑嘗節嗇衣食周濟貧乏不使人知

汪謨字亦文宏村人邑生員好賙人之急時北鄉有朽棺露齒謨見之心惻然白之縣爲瘞埋四十餘棺署知縣施公希泰以澤永鄉邦扁旌之

楊錫暢字于四八都人性孝謹少年遊湘江自擒小偷憐而釋之贈以貲勸其改行十年後遇之則富翁矣家居念本族絕嗣戶爲立祀會嘗造永濟橋施藥及棺寬逋焚券年七十三卒

鄭嘉蓮字濂若上軸人監生好義有推解風嘗於桐城金山墩賣米自江西運之值舟覆貲本空嘉蓮以水手桂元一溺水死深悲之撈屍爲斂竝歸其匱江湖行旅每稱道之

金宗鶚金村人篤行好善篤疾時猶命買置黃泥坑等義冢四處助葬朽棺四百餘歲支古溪木橋其後數賑饑皆其遺貲云

朱作楹字良友朱村人爲人謹飭弟早喪撫姪如子修祖祠及里中靈山廟所費不惜邑中議建書院作楹輸白金千兩

汪廷興字賓萬宏村人布政司理問銜孝謹嗜義爲鄉閭所重嘗捐白金三百立義學

右尙義

黟縣續志

道光五年

尙義

汪廷俊字簡臣宏村人事親孝以業鹽僑寓錢塘曉達齋政爲臺使者所倚重慷慨好施以緩急告者靡不應康熙中浙遭閩變道路流離廷俊首先創捐收贖子女務使完娶交友誠信遇人過則情恕理遣同舍生有竊其金去者廷俊知其名絕口不揚時咸謂陳太邱之盛德王彥方之長厚兼而有之事具魏嶠錢塘縣志

韓通字湖若十都人增貢生績學工文常以濟人利物爲心乾隆初例派倉穀分領多諉避通家獨任積貯有侵耗

必補其數無少差歷數十年鄉田向無陂塘非得時雨不收獲通爲經畫造塌引溪水灌之皆滋溉雖旱不爲害農人至今賴之

汪世勳字捷三錢塘人少穎異九歲爲諸生後循例銓授刑部貴州司主事需次員外郎乞假歸生平直諒肫誠以緩急告者輒傾囊助戚黨中有貧女未字爲擇配理裝送之先世居黟縣宏村省視邸壘惠周宗族有雍睦風

鹽法

志

胡德藹字曙嵐捐職布政司經歷爽直好義施續施藥施構倡建岱嶺文峯塔墊銀一千六百有奇又協邑紳開潯

陽大路四歷寒暑遂成坦途復建茶亭一所往來便之

汪聯高字凌雲黃陂人邑增生砥志苦學有文譽嫻睦任恤孚於鄉閭族士之秀者或以無力廢學高給以膏火資後皆補弟子員值隆冬察里中無衣褐者振贍之宗族祠祀土功多所規畫年未四十卒前安徽巡撫胡公克家銘其墓

舒朝啟字青萬屏山人性純謹孝友有三兄皆早逝朝啟贍養孀嫂撫孤姪授室嫁諸姪女買地葬兄嫂并買大塢地俾本支無力者葬埋善理祀會助親朋婚嫁周隣里困乏皆由經營銖積非出於力所有餘故足尙焉

葉有廣字芥一南屏人性孝友親疾侍湯藥夜不解帶兩弟宦學京師廣綜家務使無內顧憂好義舉率族人造萬松橋西干橋并大小石橋七處重建宗祠修族譜皆身任其事解紛息爭不辭勞怨善琴工畫兼究心律呂韻學李文耀英村人樂善好施商於河南光州道廬江遇孝感縣人病危欲急還而無資耀傾囊以給其人後至光州以百金報耀耀不受同鄉商其地者耀每拯其困值寒食祭客死之無後者居鄉建官田塢口石橋大星河口木橋修太平縣周家嶺壽至九十

邵世興字良光規溪人貢生樂善好施嘗修漳嶺路石亭路東升亭路規溪廟路河上墜路五處共八百餘丈又於長培亭施茶有貧不能殮者給以棺木子三人俱能繼父志

余福欽字敬堂規溪人嘗於水磨嶺漳嶺建亭盛夏設茗以憩往來行旅里鄙有急以時周之貧不能殮者施以棺生平好治道路病革猶以後山大嶺源頭石橋未及觀成爲憾後其子三人爭出貲藏工繼父之志長學彬次興洲次國憲例得附書

汪承嘉字貞吉勒下人生平勇於爲義嘗散粟以賙族人客蓼六值歲旱赤地千里嘉爲粥於路以食飢者徽人商

於六者衆歲時伏臘聚集無處所嘉與衆謀仿漢臯金閭
例爲會館以祀朱子他如架梁疊道施棺助葬力所能爲
者無不爲也嘉旣歿歛羅太史尹孚爲之傳贊

王廷虎字文豪者州人孝友樂善嘉慶七年獨捐銀五百
兩造麻田長生亭石橋又修本都橫山路八十餘丈又助
修潯陽臺路家僅中資凡有善舉無不樂從終身不倦
韓奎字挹青萬村人監生好施與客景德鎮見義冢埋淺
棺屍暴露奎僱工掩埋首尾三年不避寒暑乾隆五十三
年祁門蛟發大水漂棺浮屍奎於昌江下流買舟冒雨忍
飢撈屍收棺瘞埋以百數賙宗族造橋路善行甚多卒年
八十有二

王立本字培滋城東人監生性孝友家貧貿易湘潭蕪湖
兩地仗義踈財所至賢豪長者樂與之遊湘邑有念佛林
前明戰場地嘉慶十八年大水白骨暴露本惻然捐資百
金邀同志集千金以外本董其事築土掩埋不憚勞苦又
於二十一年買土名大塢地稅二畝餘與族人貧窘者埋
葬年五十七卒親友皆痛惜之

吳暢字林玉六都易安人孝友樂善讓產推財鄉黨稱之
嘗貿易景德鎮乾隆戊申歲蛟發水漲漂尸遍野暢置棺
掩埋以百數造黃泥坦石橋橋土建亭以憩行者復造渡

黑縣志 卷一
船於汪家港以時修葺不惜費居鄉造橫瀧大路振困施棺解紛排難年四十尙未有子五十連舉七子人皆以爲積行所致

王世樣字獻誠考州人貢生孝友樂善嘉慶十六年捐銀三百兩造璠鍾山石橋又修考川路七十餘丈行人賴之韓可儀字鳳來奇聖人幼家貧辛勤累積家漸豐裕樂善好施嘗助造石橋修際村路密維場買一僕僮詢其由來知三世嗣續惟此一子儀憫之呼其父領去不取其值江永錚字鐘侶蓬廈人監生居心忠厚嘗買婢價已酬母女不忍捨牽衣哭錚憐之立令携去不責原值買僕知爲歛大姓令習賈既長使還鄉里嘗調親族施棺木後家漸貧恬如也

王嘉柏柏山人字西穀樂善好施待人以誠嘗早行西武嶺拾得包袱一具內有銀信數封坐候至午有倉皇至者知爲江西信足述所失符合出原物還之

鄭志琪蜀上人監生好義嘗往休甯至桃源鋪憩亭中拾得白金一包坐候其人踉蹌而來言將往漁亭買鹽於此遺失計五十兩驗數不差遂舉以還

王廷璧字爾執柏山人性孝友叔母孀居奉養如所生歿爲請

旌建坊好義樂施嘗貿易東流縣值水災居民紛紛流移有年老艱於行者璧出三百金於城隍廟給發越二日金盡適縣令請賑難民得老幼完聚至今東流人猶稱廷璧之德

楊邦培八都人少失怙力田值天旱倡造張塌漑槁苗休邑界鄧氏子率衆毀塌以便通簾網魚邦培挺身不避强悍力阻塌得不毀至今賴其利

汪成瓊字尙英監生性好義嘗埋傍河無主厝棺三十餘具有欠債被逼者將鬻妻以償與幼子相抱哭瓊爲償其欠母子得完聚又嘗贖回盜租公山以免棚民開墾致田河壅塞之患

汪景霖字雨朝嶺下人事母孝事兄惟謹嘗客江右有隣家夜哭達旦霖問其故答以負公私債將鬻妻以償不忍別耳霖傾囊與之隣夫婦獲全友有難破產以救常賙恤族人之貧乏者其卒也族隣遠近咸歎惜之

王廷本字光裕國學生柏山人幼失怙事母以孝聞喜推解歲饑糴粟以振族隣壘修江柏山溪路架木爲梁值大水漂失卽復造施棺助葬置義塚三處又於貴溪縣孚橋渡柴家巷渡造舟以濟行人其善行殊可嘉尙

文苑

宋

孫適字仲通工部郎中抗長子年十四有聞從王荆公安
 石學荆公稱其議論著書足以驚人起進士以恩蔭為永
 州推官年二十有八卒曾文定公鞏為作墓誌銘見藝文
 志稱其雖素羸不廢書於學問好其治亂得失之說不狃
 近卑於為文以古為歸不夸以浮其見稱許如此
 程德章黃陂人清修閒雅和而有守於書無所不讀間出
 詞章詩句皆過人篆隸行草琴棋無不精詣詳呂左史午
 送程德章歸新安序見藝文志

程森字伯茂南山人顯謨學士邁五世孫莊節公叔達從子博學強記爲文典古有法淳祐七年進士歷官宣教郎通判撫州秩滿改衢州未赴卒

汪韶字東美一名薦咸淳四年進士爲詩有美有刺得三百篇之遺自號竹牖劉後村克莊嘗稱其演雅二絕又云讀史句如秋風駝臥棘春雨燕巢林感時傷事有足悲慨又云汪君示予行卷篇篇有意如評孫子斬二姬爲防微庶乎今昔人所未道者其詩俱見新安文獻志

奚從圭字朝瑞嗜古工辭翰嘗以詩至京師謁同郡方秋崖岳之門秋崖極賞之爲之題跋其集云學詩如學仙優而游之使自得之吾見子蟬蛻矣又嘗有回牘云二陸入洛寧復過此朝瑞一日聲名霸吾州矣後從圭登景定元年進士第官祠部員外郎

元

汪漢卿字景良以祖綱蔭知貴池縣入元除本縣丞考滿至京值開館修史翰林集賢兩院交薦其才授翰林國史編修官累轉翰林修撰至大三年以國子監丞致仕在翰苑十年凡中朝討論典故眾不能識者叩之條對不窮自號菊坡著有養浩集二十卷

明

楊宗賜字公略八都人幼受學於陳定宇先生櫟通經術兼工書能醫值元季紅巾寇亂鄧院判愈克新安時有余柏壽者團鄉兵保據院判疑其叛訪宗賜詢以勦捕之方宗賜言山民未知向背且地僻路險難以用兵宜先招撫免民塗炭院判如其言柏壽果歸順楊復一字士亨幼失怙洪武間舉神童不赴請終母養嘗築春暉樓奉母甚謹翰林周孟簡爲之記景泰中郡守孫公遇舉修府志甚加敬禮晚年構立雪齋延師以課子孫知縣胡公拱辰贈以詩

王圭豐溪人永樂戊戌進士授翰林院庶吉士好古博學篆楷入格能習四彝書

程光顯字希晦橫岡人領嘉靖壬午鄉薦授江西安義縣知縣洽聞彊記善屬文嘗與汪孟汴戴廷明輩輯刻新安名族志序而行之精楷書結體遒勁行草亦臻其妙

王大儒城東隅人有孝行親沒不忘朝夕含悲建盡思樓於東溪之上以望邱壟自號東溪後爲崇安縣簿擢陽信縣丞有政績嘉靖中與修徽州府志善行草尤喜作大書筆力雄壯不失矩度

葉尙際字道洋南屏人邑庠生天性孝友嗜讀書務窺大旨所著文詞純雅可式有南遊集行于世尤善大草縱筆

時煙雲滿紙識者珍之

舒慎字德先屏山人幼失母事繼母盡孝長嗜讀書父期以克振家聲益發憤下帷弱冠倉籩屢躋棘闈遂入南監爲郭傅二公賞識復轉北監中副榜赴部試以第一授州同知生平詩文多爲先達所推重

余岩顯城西隅人隱居教授學富才瞻嘉靖中嘗舉修三朝實錄

吳尹橫岡人番禺知縣景迪孫潛心經史嘗著綱目策問一書以闡明紫陽之學

汪振海字茂宏邑諸生古今體詩有三唐風味好遊覽名勝以助其超詣嘗客武林孤山靈巖題詠幾徧所唱和皆一時名士著有詩集

舒祥字維禎屏山人山東沂州訓導陞處州府宣平縣教諭改湖廣廣濟學善文詞所著有竊芳集駿川八詠

汪勳字無功黃陂人明末廩生博極羣書工詩古文詞自號安安道人所著有廣月令二卷詩集十七卷文集十三卷子毓璞字伯懷亦博學能文有續廣月令二卷

孫時新字玉林古築人崇禎歲貢博綜羣書爲文闕衍奇肆頃刻千言然其人平易可親而風流文雅有高人之致晚年築華萼園隱居教授亭館蕭閒無俗韻手植花木今

蔚然深秀爲後人肄業之所

史朝宏號肖屏七都人刻苦讀書不窺園者數十年訓子士俱成進士年踰七十猶閉戶諷詠不失寒素家風
余敬中字君純城西隅人下帷攻苦積學淵博先達多同社教授多名士屢試冠軍由例貢授訓導爲人公正無私質直不撓鄉里以太邳歸之年八十有三歲手不釋卷起光其仲子也

國朝

程羽儀字儀世四都人主事程保裔孫幼失怙恃苦志力學以明經教授生徒一時名士多出其門爲人正直忠厚誠以與人鄉人咸欽重之 恩貢廷試授知縣子幼孜康熙

熙戊午歲貢有文行知縣王景曾延修縣志

王楫字汾仲七都人少年好義常被奇禍拷訊備至而默然不肯及一人及事釋寓居金陵上新河賣字給口食若干世無所輕重然所交游多故老名士如甯都魏禧桐城錢澄之江甯朱貞之南昌彭士望海甯查慎行南豐湯來賀皆有詩文贈答汾仲工詩有江栖閣詩集八卷善書法泰山巍巍蕩蕩四字乃其筆跡也

朱絃字阜公九都朱村人康熙己酉科武舉爲詩深婉秀潤時露胸臆往往見忠孝之情著有嶽青堂詩文集黃山

遊草蒼霞閣草一時名士如仙裳黃雲潔躬曹溶茶邨杜
濬漑堂孫枝蔚懋叟紀映鍾孝威鄧漢儀愚山施閏章鴻
客余賓碩俱有序跋今諸公手札悉存於家詩序見藝文
志

程功字次立號拙存城郭間人少壯好學耄期不倦康熙
辛酉歲貢年八十七授南陵縣訓導著述宏富徵文考獻
後學資以證得失焉著有姓氏景行錄四十卷夢餘錄十
卷樵貴谷詩遺詩存禪雅集及自訂天咫閣詩文集數十
卷

孫光啟字石麟號漁山古築人性豪宕嗜游爲文有奇氣
詩尤欽寄歷落常北入燕訪燕市酒人遺跡歸復縱游吳
越齊楚名山水所至皆有詩歌輒棄去友人汪有光掇拾
其散逸者爲漁山詩選汪序見藝文志

許尙遠字文羽城西隅人性恬澹不樂仕進好博覽羣書
工吟詠書畫皆學米襄陽閒出入諸名家亦臻妙品黻之
工山水者江仲璧而後罕有其匹年八十餘猶據案伸紙
濡染淋漓自號補峯著有詩集存於家

江碧字太蒼二都江村人康熙歲貢孝行重於鄉里學富
文贍遊其門者多知名之士齋於過竝拙生計恬如也有
批點莊子大小題潔存集亦工草書

胡宜升字日初六都西遞人康熙歲貢泰興縣訓導性方
嚴居鄉講學雖盛暑必衣冠竟日無倦容善詩文工書法
與祁門張瑗同邑吳鶚爲古道交

江有聲字文白蓬廈人歲貢生家貧力學立身以道範文
章法古律著有艱辛管窺二集文稿行世秦龍光王罕皆
爲之序稱其文質言根於妙道醇意動乎天倪其得心應
手考諸古昔而世俗無與焉詩賦書法亦佳

舒學旦字鎬懷九都人讀書東山道院歷五十載無間康
熙庚子領鄉薦爲人誠朴爲時矜式文亦澹雅可誦著有
四書問答

胡與高字岱瞻雍正癸卯舉人能爲古文所著有存悔集
注道德上下經分晰章句義理俱有心得通醫術康熙辛
丑邑早倡首捐賑勇於爲義及上公車不事干謁未嘗與
顯達者通家居不入公門蓋文而有行者至今人猶稱誦
之

江尙溶字二川蓬廈人乾隆歲貢幼穎悟博涉經史竭力
孝養父母沒家益困日不舉火其常也教授生徒每日未
出起開卷朗誦夜必分而後寢著有愚溪文稿子錦泉亦
能文

汪士通字字亭宏村人乾隆癸酉舉人工詩善畫及篆隸

圖章之學無不致其精能風雅之聲傾動一時由明通榜
爲蕭山縣令仁厚化民去之日邑人懷思稱頌不替著有
東湖詩古文詞等集行世子謨亦能詩孫樹棠嗜古勤於
搜羅遺書

韓璵字昆山韓村人家貧力學能詩書法米襄陽著有一
枝草堂詩集

朱啟聲字宣和朱村人邑庠生博學嗜古好獎勵後進著
有律堂詩鈔

吳璿字宗虞橫岡人邑增生性孝友學問優通所著有劍
堂纂四書說要南州俞煒爲之序時藝工爲短篇多見賞
於宗匠

汪之郊字又庠四都安里人乾隆元年丙辰舉人三十八
年癸巳

欽賜國子監典簿生平澹泊自甘安分守己紫陽山長趙
公青藜吳公煒雅重其文行胞弟之祁字又京乾隆壬午
歲貢博聞閱覽凡經史皆手錄居鄉好施與排難解紛閭
里奉爲師表

范瞻雲字騰路郡庠生幼工舉子業好爲幽深澹遠之文
雖老蹶場屋不悔也甘貧樂道嘗作歌詩以自娛身歿之
日四壁蕭然門人碭山知縣朱翰梓其南浦詩稿又嘗作

五色賦及雅言千字文

林中蕙字芳谷二都章溪人邑生員績學工詩文動止皆
依古法生徒最盛脩金所入多以周親友急而已恒負債
邑中善舉率先爲倡所著有四書古人纂要字畫訂譌兼
善書有筆力

孫紹敖字孟然古築人邑增生品行端方師表一鄉出其
門者多謹愿之士嗜古能詩尤擅長歌行著有補拙軒集
奚岡字鐵生十一都際村人布衣工詩畫筆清超晚流寓
錢塘阮芸臺侍郎元定香亭筆談云鐵生曠達耿介閉門
謝客雖要津投刺乞畫非其人不可得見亦不能強也六
法之外隸古篆刻靡不精妙詩抒寫性靈超然絕俗如其
人汪稼門方伯志伊欲以孝廉方正徵之不就著有冬花
盦詩

汪偉字克承雷岡人由生員例捐州判性純篤居家立訓
以孝悌爲先嗜學好吟詠著有杖鄉集

汪燾字蘅洲宏村人乾隆乙酉拔貢任鎮江府訓導改授
崇明縣教諭書法豪放得米家之逸嘗以太白樓題壁詩
受知於梁文定相國高才博學嫻於典故名公卿交幣致
之著有蓮西閣詩集行世

俞獻字可亭城北隅人乾隆丁酉拔貢

朝考一等就教職選句容縣訓導署望江縣教諭性耿介處事不肯侵人而嚴正不可犯能強記熟於掌故工駢體隸事文教士多告以掌故謂知古而不知今非儒者也務多讀書先訓詁而後文詞所著有星巖集藏于家

孫克述字汝明古築人邑增廣生風神散朗文品修潔小楷行草各臻精工尤長於篆刻所摹漢印及時賢圖章與歙巴晉堂慰祖齊名

余逢時字際昌城西隅人乾隆庚子 恩貢好讀書以廉

隅自飭嘗以不苟取諄戒子弟下帷授徒至老不倦著有

柘塘詩鈔

韓殿拔奇聖人邑增生爲人言規行矩閉戶讀書至老不倦著有四書粹語古文章格言二書

葉棟字隆吉南屏人附監生爲人溫文爾雅而廉隅自厲善書尤長於小楷得晉唐人筆意嘉慶四年由川楚例分發江西縣丞歷署頗著勤勞以偏瘋歸里而卒

汪培字養田橫岡人邑廩生舉人汪滄之孫善事父母友愛二弟與人必以誠信常從遊訓導黃進士本騏之門力學不怠通經能文教生徒諄諄以變化氣質爲先丁卯赴鄉試卒於舟次士林惜之

朱集球字韶鳴朱村人邑庠生性迂謹拙於生事授徒海

陽與鄭用牧相友善時過從講論經學用牧往往爲之屈
集球長於詩古文辭生平漫不收拾稿多散失其友人程
堂爲刻偃谷詩鈔前令施公源爲之序見藝文志

右文苑

黟縣續志

道光五年

文苑

明

趙國禎縣學生先儒趙汭族裔其始有名宣者派出休甯
龍源爲黟學政遂遷居屏山數傳至國禎性穎異淹洽經
史百家言與同里許參政天贈齊名屢赴省試不售教授
鄉里成就人材如舒太常榮都舒觀察崇功皆其門人也
崇功所書像贊墨蹟尙完好可徵生平

國朝

丁侯字文同三都人僑寓如臯工詩著碧山草堂吟稿中

黟縣續志

文苑

有和汪謙子梅花詩三十首康熙乙酉廣陵李于濤爲之序嘗與孫枝蔚查士標相唱和又與冒巢民水繪園詩會王文簡司李揚州時亦激賞之年未四十卒於楚

江碧松字立亭蓬履人廩貢生性方嚴績學工文湛深經術嘗歷廬山皖江鍾山諸書院從諸名宿游見聞博洽晚年居鄉教授立師道嚴學則從游甚衆多自遠方來者著吟谷制義

程汝楫字作舟桂林人邑諸生工詩文親得劉學博大櫬指授詩以唐人爲宗晚年吟詠意度頗近蘓陸而不違唐格曾遊黃山賦七言律詩八首一時鈔誦今大司農黃公鉞見之謂其造語新警復如脫口而出擊節歎賞著有芥舫集藏於家

鮑元偃字質人五都上鮑村人邑諸生時桐城劉大櫬海峯詩名重海內教諭黟邑凡諸生能詩者得其指授爲詩悉入格律元偃功力尤深每有題詠不輕下筆研鍊精好一歸自然前令宛平孫君維龍輯樵貴谷詩選錄元偃詩爲多著有聊復爾集

程汝翼字輔之桂林人歲貢生候選訓導少家貧力學旣長有聲庠序工詩文善書法沈默寡言舉止必依禮則前令吳君甸華集紳士修縣志汝翼年近七十專纂列女一

門叙次節孝貞烈詳密矜慎一時稱善

朱霈原名榮朝字熙佐朱村人乾隆癸卯舉人嗜書博覽
爲文下筆纒纒千言尤用力於詩手鈔漢魏至國朝詩
凡數十卷著有望嶽樓詩集中備諸家體裁才力富有所
向無不如意晚而窮經蒐羅衆說自出所見著有經學質
疑今禮部尙書山陽汪公廷珍爲之序見藝文志

何瑞龍字信芳三都何村人乾隆丙午舉人胸襟開爽澹
於利祿特精四書文於有明一代及國朝名家之文無
不研究嘗讀書邑之復山及休甯之石橋巖覃思習靜所
詣益超含綿邈吐滂沛理趣俱勝晚年自擇所爲文二百

餘篇題曰塾課存稿藏於家

孫學道字笠人古築村人幼稟異姿年十五卽以試藝覓
賞於學使朱學士筠謂他日當以經學名世務記覽工詞
章爲詩迥絕恒蹊五言古清微澹遠尤得韋柳神韻生平
篤於親友和易近人人皆樂就而敬之著有苦竹山莊吟
稿壬申邑志大半皆其手筆

朱鐘字質亭九都朱村人嘉慶甲子副貢生多聞能記尤
熟於史不喜舉子業專致力於詩古文辭思議英偉筆勢
縱橫觀者豁目生平尙意氣好游歷結納多知名之士著
有謙山詩鈔又仿青浦王侍郎昶湖海詩傳選刻時賢詩

為續集纔及數卷而卒

程驥字思樂田段人邑諸生雅姿散朗嗜酒不羈薛枕古

籍多所博通詩文闕衍奇肆尤精小學未及著書而卒

江志修字晉卿蓬履人歲貢生工詩文致力經史有周易

周禮表注復有讀漢書筆記如文帝紀贊治霸陵皆瓦器

不得以金銀銅錫為飾修以為不得二字本帝詔語禁止

之詞班史刪節史記得字當為衍字宋景文云周勃傳宦

者令張釋顏注曰荆燕吳傳張澤今此作釋參錯不同未

知何從修引夏小正注以為澤釋二字彼此互通此例數

十條羅太史尹孚以為考覈維嚴實事求是極加賞激

武略

唐

吳仁歡黠赤山鎮人永泰元年蘇州亳土人方清

新安府志注援

新唐書按或云亳土人或云蘇州亳土皆誤也

因歲荒為亂依黠歛間偽置閭門

縣以據其險東西厭苦仁歡集鄉人捍禦鄉里明年朝廷

詔李光弼部將柏良器分兵討之

辨詳沿革紀事表

仁歡率鄉人

數千助討平之詔依其壘析黠之六鄉及饒州浮梁縣地

置以為縣合祁山閭門名之曰祁門時代宗嘉嘆授仁歡

朝散大夫石州長史復以為祁門令弭盜安民功德茂著

卒之日士民號慕立祠祀之

案永泰二年平方清始分黠地置祁門是未分置祁門以

前長史本黠之
赤山鎮人也

宋

胡乙公字貫之六都西遞人南渡時憤金人犯蹕招集義
旅勤王高宗嘉之授以總轄六州諸軍事詳元汪古逸炎
泉序贊見藝文志

元

汪申黃陂人有才略值元季兵亂眾推爲鄉長禦寇人賴
以安

明

程均保黠桂林人驍勇有謀略元季羅寇爲黠患均保率
眾保障歸明洪武二年以從勦羅寇功授正千戶武德將
軍十三年知縣郭衡贈以扁曰功靖軍國又從征陝西授
指揮使畱鎮甘肅衛卒於官

王彥忠城東隅人洪武初授廣西平樂府經歷時總帥韓
觀忍於殺戮彥忠多方調停民賴全活者甚眾從征交州
柳州諸洞蠻有功詔授迪功郎

余蔭甫字子良生而岸異元季羅寇擾攘保障鄉里邑侯
禮聘至庭委以安撫事宜市民賴之遂卽邑城之西隅拓
地以居構有環山樓一經堂以示不忘先世耕讀之意
孫贊古築人有謀略好武技蹀躞不羈應汀贛總督募勦

寇有功奏授中軍把總


國朝

汪洪道字無涯十都宏村人有勇略通術數明末常參左良玉幕及左夢庚兵變遂遜歸順治五年江西土寇王之貞及黃嶺賊瞎桂子等攻破邑城洪道率鄉兵逐之殺賊數百人賊喪膽遜去亂定薙髮爲僧棲止石鼓寺所著詩文皆禪門宗旨

舒德輝邑城人順治十六年叛兵唐士奇蹂躪各縣防祁將李芝叛應之祁城破欲乘勢入黟德輝應募率鄉兵往禦度芝必由之路屯兵石坑號於眾曰騎者必李芝也俄而一騎至德輝刺殺之則芝渠帥劉養心也芝懼而遜追獲馬匹器械無算歸報邑令不言功亦不受賞

右武略





隱逸

明

韓一芝字元和喬嶺人弱冠入邑庠任俠輕財常雪冤獄
後折節讀書聞湛若水講學南都負笈從遊棄舉子業歸
築室復巖之陽潛修養親不出

鄭桂芳能詩而好客性迂疎不耐煩劇洪武間徵為錢塘
令未幾解綬歸葛巾野服徜徉山水間醉後每誦太白剗
却君山好平鋪湘水流巴陵無限酒醉殺洞庭秋之句桂
芳有詩數十首號樂清集教授徐大章為之序謂其有太
白胸次

汪尙功黃陂人隆慶舉人授湘潭令不一載賦歸來營別業魚隴傍有泉出自然成塘中有兩石如蟹螯狀尙功日與友人飲酒賦詩題舟聯句云止水不驚三峽險野航恰載一身閒鄉人擬之彭澤高風

汪文旺七都人幼敏慧博稽古今常遊吳越江漢閒所過勝地流覽賦詩著有屏山集後築室復巖絕跡城市終身泉石焉

葉善新號培齋南屏人隱居教授好學力行不交世務以終其身

李發字春埜三歲失恃事繼母以孝聞性磊落有山水癖拙於生事自號雲樵道人居豐樂里宅傍構一小臺曰雲圃廣蓄花木被鄰火延燒因卜居城南三里許一齋翼然四周種竹不三載蔚然茂林籬內草徑曲折砌花參差從外望籬五畝不足入籬看花十里爲遙名曰筠谷性喜搜奇方人有奇方輒以盆花易之一日得藤杖二天矯奇怪狂喜走二十里入相見山以一贈孫山人不二相見山者孫山人修真處也道人時往來山中與山人爲世外交聞縣南天潛山多隱君子策杖來遊得中阿躍然曰此一片石壁足爲吾菟裘矣遂誅茅架屋挈家居焉依山布置循乎天然前此奇巖邃洞概湮埋榛莽間自道人來棲奇

與始闢廬山面目若非遠公殆不能洗出也

孫嘉符字中孚號不二幼好道喜讀黃庭經修守明堂入相見山習靜二十餘年汪有光過相見山訪孫山人詩序云山以相見名何也易曰相見乎離離上於山旅也山人學道此山足不踐世二十年矣旅之義何居或曰山人厭世天以下皆旅也一名弔愚山山人憫下愚也或云釣魚山釣魚於山志不在魚矣孫子中孚得王子得乾江子得慧相爲侶焉


汪敦敬黃陂人少勵志操絕意仕進喜吟詠尤工書法芒屨竹笠徧游名山適楚遇繆昌期相得甚歡遂與繆締兩人社適燕朱之蕃聞而造訪焉又與朱締兩人社旣而悔其所爲盡屬意氣歸居碧山之阿自號漢綺山人閉門終老有漢綺吟行草書人爭傳之

汪有章黃陂人幼負氣骨博洽羣書於技無不通曉嗜遊山水足跡幾徧天下寓楚最久與魏肖生悅汪仙友桂賦詩定交時衡王聞而延致之爲上客行分庭禮居期年歸隱碧山深處終其身不入城市自號半憨著有半憨子集國朝

王伯巨珠川人布政俊得曾孫有隱德不求聞達處人心無崖岸年踰九十足跡不至城市誨子弟必以孝悌爲先

邑侯屢請賓筵不應

右隱逸



藝術

明

江玉字仲璧又字仲文大星人山水花鳥皆擅長錦雞春
富貴柔枝嫵葉姿態橫生尤其出色作江湖蘆鴈氣格清
絕作樹木竹石平遠疎曠

汪士雲字蘇黎十都人善行草得趙文敏法臨晉唐諸帖
甚夥用筆結構渾然古朴

汪宗哲七都人工畫及墨竹自號灌園叟

江柱大星人流寓丹陽山水人物皆極力摹古老筆縱橫
饒有荆關遺意自號黟山

余涪字敦父城西隅人綜經史工吟詠尤精岐黃家言父時啟以經術下帷海陽訓諸生值萬曆戊子歲大疫出秘方全活不可勝計休人德之因請家焉

江松字鶴舟大星人工畫所作花鳥草蟲與陳道復徐青藤相頡頏而設色淺深別有一種活潑之意令人不忍釋手

王一觀一都人雲南曲靖府經歷書法嚴整學顏柳逼肖尤喜作大書郭隅外關帝廟燭光劍氣四字筆鋒遒勁更覺超羣

黃古潭祁門汪機弟子少業儒通五經以疾就醫治病每有超見如脇痛皮膚紅腫醫用瀉肝舒鬱之劑不效黃以瓜萋一枚治之則愈如婦人鬱結經閉諸醫皆云有孕治用安胎之藥吐酸反甚黃以補肺瀉肝之劑而愈此二條其門人休甯孫一奎所述卽著赤水元珠醫旨緒餘之生

生子也黃鑑幼孤事母以孝聞涉獵儒書邃精於藝著有地理星形會一編醫林摘粹石山吟稿等書

史謀善鍼灸貧人求療者日以百數未嘗受一錢或召之醫必豫設大宅居之以爲四方男婦就治之所出游則曠舟從醫者或數十艘有山左人病鶴膝幾就木矣求鍼於

史史曰是需時日未能猝愈也其人自揚州隨之渡江歷姑蘇至吳興凡百日蹶然而起

程宗默字伯言桂林人縣學生嘉靖初與友人汪姓者讀書城南天尊觀晤羽士偕追之汪半途返而宗默從入終南時宗默父祖化年已老及十年家中死亡盡祖化親往陝尋之羽士謂宗默汝祖塋於數有災念汝祖德厚應有後故引汝至此今汝父將至可以歸矣與書一卷而別下山遇其父遂歸視其書皆方藥宗默摘其中害物命者棄之病瘳請宗默治者著手即愈久之生一子曰純德宗默構屋於桂墩獨處其中年九十七而歿今其子孫每一世有一人貽齋者無他異惟少疾病爾

國朝

舒曉字應日九都人善丹青山水學李成墨竹學文湖州花卉翎毛神氣飛動不爲法拘頗得雅趣

黃雲升名志升以字行書法勁健凡秦漢碑刻晉唐法帖必探其精妙大有晉人典則

孫良楹古築人真草行書皆瀟古道勁度越流俗直可頡頏北海而伯仲子昂爲一時之名筆

盧炳字日如盧村人工行草如瑞雲飛空流水赴壑妙不可及

范尙時字子宜一都人工行書

黃楷字端木四都人工漢唐隸法與鄭谷口竝美如蒼蚪
老檜鐵屈銀蟠居然大家

項日懋五都人能書清勁方正自成一家

程于達字君儀桂林人善書筆力清健結構端嚴寫米兼
蘇人求其字者如市性不懶筆一揮卽成凡寺觀廟宇以
及祠堂書室無處不有冊頁手卷人家得之如獲至寶與
黃自先同時其名與之相埒

王懋日字晉三四都人歲貢生工書凡一點一畫必有祖
述無率筆

汪士振字聖集十都人工行草嘗云指與心應腕與筆應
變化出入不可端倪方可爲書卽草草數行亦必動符軌
則

吳震字聲遠六都人附貢生工書法得董文敏筆意行款
精工尤人所難及

吳茂字枝蕃十都人精書法董文敏字畫清勁不減晉人
風味

孫鵬字翼雲古築人邑生員有文品草書善學懷素得行
雲流水之趣

舒文煒字去文九都人善丹青有平淡清遠之氣得董北

苑米南宮之遺法兼善音律

杳成字用章十都人工草蟲凡蝴蝶蜻蜓一花一葉各臻其妙工緻可愛

吳椿字齡干六都人工人物筆力蒼古墨氣秀潤凡衣巾鞞履位置天然無不盡美

余麟字瑞昭號石村城西隅人工畫善著色大綠尤其擅長凡一山一水一點一拂必師古人無不神肖固不徒襲其貌者同時如許補峯輩亦皆心折焉

王鼎字定周一都城南人善畫松高古蒼勁山水師郭熙花鳥師黃筌人物師韓幹各得其似亦能詩多勁句

江岷源字滌文城北人邑增生書法入神狂草奔放縱橫爛熳不在顛素而下

吳喈字鳳音城南人邑生員工山水淺絳丹碧水墨清韻無不灑灑可愛大率模擬李唐馬遠居多界畫樓臺及人物皆傅色鮮明溫潤名著於時

項嘉懋字勉齋瑜村人邑生員臨做法帖筆勢遒勁行列古雅人多稱之

陳嘉裕字學餘江干段人邑生員書宗二王腕力甚勁端莊沈著亦時流罕及

胡宗昇字賜谷城中人少業儒父死家貧棄而學醫通王

叔和脈訣熟李時珍本草綱目遂以醫鳴爲縣醫學訓科有歙人兄弟求醫其兄病重肩輿而至弟步行相隨診脈後弟亦求醫胡曰君脈沈細是風寒內閉誤食油膩滯氣之物致臟腑不舒脾胃失調不過二劑愈矣君弟面目青浮肝氣已敗刻下無妨來年春氣動肝木司令雖有良醫亦難著手矣其弟不之信已而果然知縣王公神其術贈額曰躋世春臺

鮑子文城北隅人精小兒科尤長於痘疹有鄰家兒三歲出痘顆粒細碎紅紫不分延之醫初入門便望見曰醫便死不醫是箇瞎子後果如其言

胡喬相字廷翰縣學山人精太素脈訣有婦人病瘵經年諸醫不效延喬相至見之曰此傳尸癆也不早治必死其家懇之與八赤毒丸十粒作二服腹痛甚下大蟻十餘枚長尺餘大如箸赤首黝背赭腹其狀如蜥蜴再服又下七八枚但差小耳戒勿食雞魚香燥調理數月而愈父漢卿善養生年九十七歲喬相亦年八十五歲子舜因亦精岐黃得家傳竝有名於時

程國瑞字靜菴工醫術康熙五十五年入太醫院供奉授御醫官首領

余香字開三府均人少穎悟家貧不能讀書業石工自出

匠心製石簫石篋皆中律合調作諸細巧物件上鐫書畫
竝有家法人稱絕技云

江昭字融萬梧村人邑增生能書臨池潑墨竟日忘倦篆
刻圖書有文衡山程穆倩風格

汪純粹字惇士十都人善醫著有傷寒論編孝慈備覽遊
秦醫案行世

孫殿元字殿英古築人武生員書畫雙絕尤善大字酒酣
興發一揮數十紙疾如風雨矯如龍蛇最可人意其畫清
淡蕭散無塵俗氣做趙千里趙松雪諸名家皆逼肖

王溶字潤蒼號鶴艇又號老鶴城東人畫山水人物不名
一家其蕭疎閒曠之致翛然絕俗然性迂僻雖廚斷炊烟
不肯受人促迫故片紙殘縑人皆藏之

韓潤字愚村奇墅人少業賈性好文墨學爲詩時有佳句
能以指繪山水花卉兼勾摹古法帖惟肖遊京城頗爲時
賢所重援例得兵馬司吏目分發北城飯廠卒於官

朱樹秀字松亭朱村人長於詩文通勾股算術間學秦漢
鐘鼎古篆刻鐫圖章亦饒古意自號贅儂

潘文杲字旦初一都潘村人幼能孝順友愛父啟華善岐
黃術文杲克承家學尤精幼科應手輒效四方求醫者踵
接於門所得之貲捐江柏隴義冢又倡造古溪橋并立橋

會仍爲修費


汪烈字敷廷官路下人邑增生性醇謹孝友克敦好古博雅尤工翰墨臨池學鍾王以下及宋元明諸家而蒔枕米南宮者最久惜年四十而沒未竟所學今流傳片紙人爭重之

汪曙字曉山官路下人少孤善事母友愛諸弟弱冠師皖江何龍寫山水人物有生動之致後益肆力撫倪黃沈董諸家寒暑不輟稱其畫者謂風神秀潤青出於藍


舒元達字非聞縣前人究心書法久得聖教序及懷素筆意老更入神其筆勢飛舞如怒猊抉石風雨合離而結構却極謹嚴

汪林芑字萼輝三都監生爲人恬靜性耽詩畫所居有宋人壘石頗極奇險林芑於其中焚香浣筆未嘗一與外人事畫有自然生趣

右藝術



人學百賦解在劍林芝飲其中焚香對筆未嘗一與俗人
 其材甚罕其藝甚二階道至為人師精於理精於法其法
 世林好風



黟縣續志

道光五年

藝術

胡立嘉字公廷歲貢生牌樓裡人嗜奕每與人奕輒贏贏
 則將錢沽酒與人對酌人多喜與之奕一日正與人奕其
 家人來說小兒驚風昏迷不醒速急要回去請醫其人貪
 奕不去又輸錢嘉言曰我亦通小兒醫請與君同去一看
 遂齊至其家知是風痰用抱龍丸一顆薄荷燈心金器煎
 水調下過一時即清爽如故其家感激不盡時人稱之曰
 仙手佛心

汪宜堅字紹庭宏村人好施與重然諾性耽書常以筆墨

多系賣志

藝術

自隨幼從武林姜士琦學書尤工楷法刻多寶臨本爲塾子弟楷式碧陽書院崇教祠題榜及家塾匾皆其手書汪德溥字仲敷宏村人工白描人物兼善翎毛花卉涉筆成趣栩栩欲生傍及雜技無不精巧莫春暉字葵齋月塘人幼耽學能詩尤善畫以太倉王氏爲宗筆墨清潤林壑深密平生好遊晚歲歸里素習岐黃每以醫藥濟人未嘗靳惜潘元森字茂堂城西隅人附貢生其祖父皆以醫善名元森承家傳活幼有術求醫者滿庭戶有貧困者每不受其酬著有可行集本草畧

黟縣續志

道光五年

人瑞

汪文灝字希梁一都湖洋坑人家世清貧性情純篤孝養謹慎壽至百歲嘉慶二十五年禮部題請恩賜六品頂戴給銀建坊外仍賞大銀一錠緞一疋卒年一百零四歲

汪開誠字樸如宏村人賦性醇良持身端謹孝事祖父義訓子孫壽臻九十身歷四朝嘉慶十一年議叙六品頂帶親見七代五世同堂道光四年由禮部題請奉旨給與七葉衍祥匾額賞給緞匹銀兩

新驚曰此仙人也以詢舍人舍人指新安商以對白動容
 禮之曰君仙人也商曰某實不能詩某書壁閒者鄉人許
 宣平作也白閒關踪跡至其居一再訪之見題壁云隱居
 三十載築室南山巔靜夜玩明月閒朝飲碧泉樵人歌隴
 上谷鳥戲巖前樂矣不知老都忘甲子年白低徊久之亦
 題其壁云我吟傳舍詩來訪真人居烟嶺迷高跡雲林隔
 太虛窺庭但蕭索倚杖空躊躇應化遼東鶴歸當千載餘
 題罷而去策杖入黟詩曰磨盡石墨嶺潯陽釣赤魚靄峯
 尖似削堪畫不堪書過章水詩曰清溪清我心水色異諸
 水借問新安江見底何如此人行明鏡中鳥度屏風裏向

晚猩猩啼空悲遠遊子至碧山徘徊不舍因棲焉謁黟令

薛稷留連竟日薛善畫白為題贊一畫一贊世傳二妙後

有人致白書邀白他去白作詩答之曰問余何事棲碧山

笑而不答心自閒桃花流水杳然去別有天地非人間按

白至黟羅鄂州新安志載其事而多疑辭今采其事所有疑義詳拾遺中

許堅江左人早歲以時事干江南李氏不見禮拂衣歸隱

茅山太平興國八年自茅山游廬山或在洪州西山吉州

玉笥山舊與樊若水相善若水北渡因轉輓於江南遇堅

於簡寂觀勉之以仕輦蹙不答後客遊於黟樂之因作詩

云黟邑小桃源煙霞百里寬地多靈草木人尚古衣冠市

向晡時散山經夜後寒吏閒民訟簡秋菊露溥溥遂家焉
今桃源洞有許氏蓋其後裔云或曰堅卽宣平也堅其名
宣平其字全唐詩云堅字介石廬江人未知孰是

有詩編次南唐

宋

孔端木字子與舊名端朝宣聖四十八世孫宣和四年徽
宗幸學訪宣聖後以行藝俱優特賜上舍出身解褐太學
建炎南渡從行注黟令樂其山水因卜築焉端木少以文
學知名至老益高古有南渡集十卷詳李教授以申傳見

藝文志

張九成字子韶號無垢居士開封人徙錢塘從楊時學紹

興二年對策第一人樞密汪勃與之同榜九成除宗正少
卿權禮部侍郎兼侍講時秦檜力主和議九成上陳十事
言彼實厭兵而張虛聲以撼我誠能從吾言使權在朝廷
與之和未晚檜惡其立異謫守邵州旋檜黨何鑄劾以矯
僞欺俗傾附趙鼎落職時樞密亦以忤檜退歸田里九成
聞有林泉之勝慨然遠訪流連數月而返其題培筠詩石
刻至今尙存

江萬里字子遠號古心都昌人少神雋有鋒穎連舉于鄉
入太學有文聲黟人江涪萬因輯會通譜適芝城訪舊宗
聞萬里賢歸築室于石鼓寺之右遣弟一鶚寅簡禮請至

黟受業焉其教人率以身爲準式先躬行而次文藝後一
鶚寅簡俱登第萬里以舍選出身歷官至左丞相兼樞密
使予祠時咸淳九年萬里年七十六矣明年元兵渡江萬
里間荆襄失守鑿池芝山後圃扁其亭曰止水及饒州城
破萬里竟赴止水死今石鼓寺有相儒堂舊志云宋丞相
江萬里讀書處也

元

倪士毅字仲宏號道川學者稱道川先生休甯倪干人自
祖父皆以經學教授鄉里士毅世其學及長師鄉老儒朱
敬輿陳定字學益以充黟人汪泰初聞其賢而敬禮之築

室霞阜里中請先生奉二親來居躬率子弟爲邑人問學
焉士毅教授於黟二十有三年黟人信其言尊其行旣沒
而復思之泰初之子志道與弟存心謀曰先生設教吾邑
遂畱家焉蓋所謂沒而可祭於社者請改葬先生於黟以
系邑人之思遂自休甯改葬先生於黟南坑余思鳴之原
子尙綱黟學教諭尙德洪武中舉明經不赴尙誼嘗校定
趙東山春秋集傳今七都里安倪氏先生之裔也

道川先生嘗遊

陳定字先生門爲元碩儒教授霞阜二十餘年與趙東山
在環谷諸先生講學黟之執經問道者踵接於門先生非
仁義道德之說嘗論定於朱子者不以教
人是延紫陽道脉於黟者實先生之力也

明


金達江西浮梁人精形家術望氣至黟讀書廣安寺與程廷衡善程曰我貧甚他無求於君惟求救貧術耳金因請其葬地觀之曰我別有作法請先以異路青雲富君程善而從之又至黃陂訪汪章山曰觀君造詣可致青雲然觀君家墓當君之身未可期也若不棄芻蕘當贈君以大魁章山笑曰君先自贈然後贈我金曰我不才然以先祖墓卜之某年會榜當得元至廷試未免屈二人下耳章山不之信已而果然

陳良弼東粵人前明進士任江南督學鼎革後遯跡至黟林厯山或端坐垂珠洞或吟嘯香爐峯不入市塵優游終老

國朝

張膽字貢赤休甯小硯人通經史以忠孝自矢隱於黟之天潛山與汪有光等講道石林三十餘年黟人比之道川先生焉

右寓賢



衣坐流

古書

天翻山與

給平

曲觀平竟亦於中心兩人

何

